

A Liadl, ans üwa KI

Text+Musik: Blonder Engel

A Liadl, ans üwa KI
Des schreibt ma ned anfoch so hi
Es soid informiern
Und dabei amüsiern
Und des besser wie Chat GPT

Jo wos is eigentlich a KI
In Woahrheit a Technologie
So simpl des klingt
Und wohi uns des bringt,
Entscheidn am End du und i

Weil da Mensch hots erschoffn und da Mensch
schofft ihr au
Na vo söbn hot de faule Sau nu nia wos tau
Owa wau mas ihr sogt, daun lernts ohne End,
Datn um Datn werdn hoch effizient
Analysiert, daun wird prognostiziert
Und des detailliert spezialisiert und daun
Schlogts di im Schach – im Tennis hoit ned
Sie schreibt da an Text – dens ned vasteht
Sie moind da a Büdl und was ned wieso
Weil meistns do geht ihr da Kontext hoit o
Und Emotionen sowieso

Des Ding mit da künstlichn Intelligenz
Is nur: jeda beinoh scho vawendts
s’Problem is nur des
Und jetzt sei ma ned bes
Es is so: kaum ana dakennts

Weil künstliche Intelligenz
De fordert scho ziemlich immens
Primär und per se
Und vü mehr nu denn je
Unsa Medienkompetenz

Aun fost jeda Eckn findst heit scho KI
Doch nur sötn do winkts und sogt: Jo, des bin i
Sie vasteckt si gefinklt in Technologien
Wo ma si oft goa ned denkt do is drin
Vasteckt, dass da Mensch sie trainiert oda
trimmt


Und sie Fehler daun a übernimmt, waun da
Netflix an Füm empführt, der da ned gfoit
As Navi am Zü is, mittn im Woid
Da Internetdoktor a Totmödung schreibt
Und da Typ vo da Datingapp wieda ned bleibt
Weil sie de KI do hoit a weng reibt

Goa ned so anfoch des mit da KI
Und trotzdem beschäftigt i mi
Damit in dem Liad,
Weils mi intressiert
Und ned nur mi und drum steht irgndwie

Auf amoi künstliche Intelligenz
Gaunz vorn in de Nochrichtntrends
Hot fia de an Potenzial,
Is fia aundre fatal,
Es herrscht anfoch Ambivalenz

A am Staummtisch wirds scho ois
Gesprächsthemma gsetzt
Und meist soiwoi üwa – ois a untaschätzt
Auf da an Seitn birgts jo freilich a Gfoahr,
Doch gleichzeitig is a des Gegenteil woahr
Unendliche Chance und a Möglichkeit und
Potenzial und Gelegenheit und so muas
Gfrogd werdn oiso zu wöchn Preis
Stichwort Fake News und irgndwo Server im Eis
Obs guad oda schlecht is – de Frog stöt si ned
Sondan wia ma vaantwortlich um damit geht
Drum faunga ma au, dass ma do drüba redt

Oiso für oda wider KI
I glaub ehrlich es is a Remis
So offn des klingt,
Doch wohi uns des bringt,
Entscheidn am End du und i



Der Song ist 2023 im Rahmen eines partizipativen
Projekts zur Verbreitung von KI-Verständnis entstanden.
An der Idee sowie der Erarbeitung der Inhalte haben
20 Co-Researchers (Citizen Scientists, Künstler*innen und
KI-Expert*innen) mitgewirkt.
Text und Musik wurden von Blonder Engel geschrieben.
Projektleitung: LIT Robopsychology Lab.



Song anhören & mehr Infos zum Projekt:
www.jku.at/ki-liadl